



Amir Menjaga Kebersihan Sekolah

Syaqellah Izyan



Selamat pagi! Hari ini hari Isnin. Amir berjalan ke sekolah dengan penuh semangat. Dia memakai seragam sekolah yang bersih dan kemas.



Amir sampai di pintu pagar sekolah. Dia tersenyum sambil mengangguk hormat kepada pengawal sekolah. Amir juga mengucapkan selamat pagi kepada guru yang bertugas.



Semasa berjalan ke bilik darjah, Amir ternampak kawasan padang sekolah kotor. Ada pembalut makanan dan botol plastik bertaburan di atas rumput.



Amir merasa sedih melihat sekolahnya kotor. Dia tahu sekolah yang bersih membuatkan semua murid merasa selesa dan gembira untuk belajar.



Amir terus berjalan menuju ke tong sampah berdekatan. Dia mula mengutip pembalut kertas di atas tanah dan membuangnya ke dalam tong sampah.



Kawan Amir yang bernama Aisyah nampak perbuatan baik Amir. Aisyah datang mendekati Amir dan membantu mengutip botol plastik kosong.



Rakan-rakan yang lain seperti Nabil dan Siti turut menyertai mereka. Mereka bekerjasama membersihkan kawasan padang sekolah dengan gembira dan pantas.



Sekarang kawasan padang sekolah kelihatan sangat bersih dan indah. Rumput hijau kelihatan segar tanpa sebarang sampah sarap.



Semasa perhimpunan pagi, Cikgu Salmah memuji sikap Amir dan rakan-rakannya. Seluruh murid dan guru bertepuk tangan beramai-ramai untuk mereka.



Amir merasa amat bangga dan bersyukur. Menjaga kebersihan sekolah adalah tanggungjawab bersama yang membuatkan semua orang bahagia.